

續修陝西省通志稿

第一百十冊

卷二百八

續修陝西通志稿卷二百八

文徵八

奏議八

陝西高等學堂教法失宜疏

光緒三十一年八月初一日

王步瀛

竊惟各國語言文字爲今日學堂急務盡人皆知第查奏定章程中學堂高等學堂始習各國語言尤重英德法語其每星期功課多少釐有定規原不容畸輕畸重凌節而施致啓蔑棄中學之漸近臣鄉人來聞陝省高等學堂每一星期功課三十六鐘而英日文已占二十鐘之多計每日有習英日文至四鐘者微論學生智識不開斷難熟習即令舉皆明敏而於中國根本學問亦勢必荒落不暇兼顧並營此皆由近年學務人員任用失當故張皇補苴本末倒置於陝西學界大有損害聞新簡提學使劉廷琛平日講

求學務熱心教育應請飭下陝西撫臣督同該提學使遵照奏定學堂章程速行改良以資造就庶陝西人才輩出尙有報國之一日否則省城學堂既極腐敗外府州縣益無所激厲無怪改書院爲學堂呼山長爲教習上司以查學而調劑屬員劣紳因籌款而苛派鄉里掩耳盜鈴民氣囂然士氣頹然甚非國家之幸也抑臣更有請者語言文字之學必大學堂習專科者所當悉知若但論辦理則前大學士李鴻章又何嘗精外國語言又何嘗不善辦交涉如必人人責習各國語言文字臣恐勢趨偏重將來成就豈必盡爲通材陝西士習敦樸淵源關學近來風氣漸開益知講求時務惟學堂甫立肄業者率多中年以上口齒既笨憶力亦減事倍功半往往徒勞臣之愚見擬凡現住中學及高等學堂者所有各國語言文字除已經學有成績及有志嚮學外其餘十人之中但

得三五人留心嫻習即可用世有餘似不必一律強以所難如此
稍爲變通既不至舍本圖末徒工外國語言即性質稍遜者益可
專心中學保存國粹並乞飭下學部速行覈議具奏候旨咨行陝
西以資遵辦學界幸甚所有陝西省城高等學堂功課表謹照繕
清單恭呈御覽可否並乞飭交學部以備核辦臣誼關桑梓既有
所聞理難緘默是否有當恭摺具陳伏乞聖鑒訓示施行

遞奏
疏接

此疏入後辦得旨
學部查核辦理

請整頓陝西學務疏

光緒三十四年
八月初四日

王步瀛

竊維興學要政自全體言之則關國家命脈自分子觀之亦爲地
方元氣元氣剝喪國家受其影響故辦學之人貴各盡義務弊絕
風清有言責者尤當知無不言言無不盡日前臣曾將陝西高等
學堂功課表隨摺繕單恭呈御覽其辦理失宜已在聖明洞見之

中惟事關桑梓聞見較眞若不剴切瀝陳任聽學界腐敗人才消
乏非惟無以上對朝廷抑且無以下對父老爰就管見所及其舊
有而必當改良者五其昔無而亟宜創舉者四謹一一爲我皇太
后皇上陳之一宜劃一辦法也陝西舊有高等學堂二所原不爲
多惟宏道向隸學政辦法不無歧異現已改制自應與省城高等
學堂同歸提學使管轄聯爲一氣此外各中小學堂功課程度一
切皆宜整齊不得參差摻雜自爲風氣其位置部署均由提學使
照奏定章程體察地方情形稟承督撫學部斟酌損益藩臬不得
掣肘一宜慎聘教員也高等學堂所以造就高等人才若教員學
問空疏不惟無以饜諸生之望且於立學宗旨亦大背謬竊聞好
學之士往往以質疑問難招教員忌在學生實欲請益而教員自
反空疏遂以爲有意窘辱不知教學相長原爲切磋疑而不問何

以學爲問而不知又何須乎教員乃教員不內疚反遷怒於學生
遂致師弟睽隔上堂而外終歲幾不得一晤亟宜破除情面妙選
通儒並照學科分給學生劄記准其各書疑難由教員定期批解
頒發一宜廣閱書報也陝省書價最昂寒士多艱於購備而學堂
藏書極富原准學生隨時借閱惟經理人員多由請託而來拋棄
義務時與學生齟齬遂相戒不敢往借查堂內管書齋長及級長
日與學生交接必當由學生投票公舉始免隔閡並應將堂內所
藏書目一一列表藏書處門外借書各學生亦另列一表書明某
月日某人借某書共幾冊還者立即註銷同懸門外庶觸目了然
一掃夙弊至閱報之益尤足擴見識而長志氣自前升任撫臣升
允到陝官場專以愚民爲政策學堂購報多種僅備教習委員之
閱看及其親朋僕隸之取攜片紙隻字學生從無見者諸生博古

而不通今學將焉用應令自高等學堂以下至高等小學皆設閱報一所購置各報派值日管理以便學生暇時討論無論堂內何項人員均不得私攜出外違者以破壞公益論一宜裁去津貼改爲官費也聞堂內諸生新考者一切自費舊來者月給津貼二兩學生外出覓食未免恐誤功課故炊煙四起殊非所宜似應無分新舊一律改爲官膳陝西日用頗賤裁去津貼費亦無幾而學生得專心致志收效實多此外若教習委員亦當同甘共苦不得在堂內自起爐竈以肅學規而儆貪鄙中小學堂亦准照此辦理一宜將省城客籍學生劃開另辦也查高等學堂學生定額僅二百名陝士待學孔殷自必當補足額數至客籍學生聞多顯官子弟與堂內教習管理各員聲氣相通若與本籍學生雜處勢必易占優勝豈惟弊竇叢生亦且衝突堪慮不如劃清界限借學堂地方

教習爲客籍學生另開附班宿膳均由自備卒業一律給獎並酌量情形令繳學費庶可行之久遠不滋流弊凡此五端皆用舊日之規模而加以改良者也一宜申明定章一律遵守也臣竊見京師各學堂其教習及管理員之賢者接待諸生類能情誼交孚而上堂後教習手畫口講幾無暇晷乃聞陝西學堂教習視講堂爲養尊處優吸煙飲茶役視學生甚至斥責辱罵猶覲然以爲認真其委員之徒以及廝役竟至以有嗜好者充之頽惰自放學生無敢過問腐敗至此學務安望起色應令詳定章程各明權限揭之講堂學生如有違犯准教習及各員聲明監學照章處分如教習各員亦有違犯而各員若關礙情面通同欺朦亦准由學生公舉代表稟明監督靜候照章核辦惟不得聚衆要挾以防流弊至對待外國教習尤當力守合同主持大體以一事權而斷轡轡且以

祛崇奉外人之劣性一宜無論高等師範中小學堂均設附班也
查學堂官費皆有定額即或嚮學情殷不免爲所限制應令各學
堂特開附學一班中文明順即可與選食宿一切自費課程與堂
內諸生無別並准同閱書報三四月後其沈潛有志各科能及格
者隨時提入官費以資鼓勵其或正額有缺監督教習亦就附班
擇尤傳補免致僅試以文而入堂後各科有毫無門徑之苦一宜
注重師範以簡易科爲入手之基礎也聞陝西省城師範學堂腐
敗爲諸學堂冠然據前升任撫臣升允原奏其辦法係照優級查
優級者所以預備派充中學堂及初級師範學堂之教員而蒙小
學堂現方極力提倡教員將何從取給雖由各屬分立師範傳習
所而教員未必得人學科未必完備不若在省城立一初級師範
簡易科慎選教員認真訓迪照章一年卒業其學生令各州縣考

選無論舉貢生童以十人至二十人爲率到省後畧加考驗如其人文理不通或沾染嗜好者嚴屏不錄陝西九十餘州縣若欲教習足資分布非如學部八百之數不可其經費即由各州縣分籌如以師範學堂地基狹隘不能合辦查陝西貢院局勢宏闊與其爲有名無實之工藝不如培化民成俗之大本俟風氣丕變人才輩出然後體察情形分別裁改一宜仿照北洋設立半日學堂以開風氣也陝西風俗異於他處其民服田力穡以農爲本與其拋荒學業必不輕棄農務若非導以求學之益即欲實行強迫教育勢必不易就緒聞陝省官立各蒙學有懸其名於廢寺而寂如無人者有有學生而教授仍不得法者自應隨時查覈懲辦整頓其半日學堂凡二三百家以上之村莊不可不公立一所俟一二年後速成師範有人然後收村內八歲以上十五以下之童子教以

蒙學課本上午授課午後即各聽便既立教育普及之基而於從事畎畝復無大妨將來擴而充之亦甚易易凡此四端皆屬創舉之大端而不容稍緩者也夫以學務關係之重且大管理極形複雜則肩斯任者其艱鉅亦爲人所共諒臣秦關下士幸際聖明既無專家之長又非考察而得復何敢妄糾短長樂於府怨惟以上九條則徵諸輿論揆之愚衷確見其不可不變不可不興利害判然有目共覩而二者之中興利差緩於除弊誠以夙弊不清良法即以叢詬豈第學堂一端哉凡百政事莫不皆然可否飭下陝西撫臣照臣所舉條目於各處學堂加意整頓俾關輔士風蒸蒸日上不致辜負朝廷之教育虛糜黎庶之脂膏則幸甚矣臣爲陝西辦理學堂急宜循名覈實力求進步起見是否有當恭摺具陳伏

乞聖鑒訓示

遞齋奏疏
既入得旨學部按是疏

請整頓陝西農務工藝疏

光緒三十四年八月初四日

王步瀛

竊維洪範八政貨次於食誠使天下無不生利之人即國家無不
滋大之理中國以重農著工藝亦燦然可觀在閉關鎖港之日未
嘗不可支持海通以來彼以其麗我仍其樸彼以其巧我仍其拙
漏卮日出國民交困然猶幸內地交通之煩費華僑出洋之苦卓
得以阻其暢銷而奪其餘利近來鐵路交通日形利便影響所及
腹背受害不淺其民既乏遠涉重洋之閱歷而苟逐目前嗜好不
知利用母財徒揮霍於奢靡柔脆之外貨馴至土貨滯銷金錢日
缺後患何堪設想即以陝西論之汴洛鐵路開工已久洛潼陝甘
兩線現亦籌議辦法將來鐵路一旦抵陝則外貨之輸入若決江
河而輸出者不過生貨寥寥無幾陝西本凋敝之區自非趕將農
務工藝極力興辦以期抵制實無法以善其後臣查前升任撫臣

升允覆奏光緒二十八年正月十七日欽奉上諭一摺據稱就陝西大學堂中先設農務工藝兩齋將來成效漸著嚮學者多再行分設農務工藝學堂以廣傳習奉硃批農務工藝足厚民生著即認真興辦毋涉敷衍仰見聖明利用厚生振興實業之至意然形諸奏牘未聞成效時勢所趨務在當急現任撫臣曹鴻勛講求新政派遊學開油礦辦鐵路固已次第推行而農務工藝關繫國計民生更未便視爲緩圖應請旨飭下陝西撫臣查明前此附立之農務工藝兩齋是否空言敷衍抑實有人肄業其如何力求進步以期抵制外貨改良土貨之處統將實在情形速行奏明朝廷以資整頓此外所有陝西省城蠶桑局農工商礦局創辦亦十餘年間仍有名無實不過藉以位置間員近年改貢院爲工藝廠地極寬大僅列機器數具招匠十餘人製成器物少而且粗既復滯銷

徒資暗耗凡茲局務聞多歸布政使總理查布政使樊增祥官陝
多年人尙有才並請飭下陝撫督飭該布政使激發天良破除情
面將各局應辦實業認真振興總期循名覈實日有起色並將現
擬如何振興情形專摺奏明以備考覈而徵後效臣上年奏請急
設農部並陳十二利因諸臣素未明農竟格不行微臣富民足國
之願積而未伸陝西水深土厚最宜農業足資工藝果能實力舉
辦將來成效昭著不特陝西世享其利亦足爲國家裕無形之富
強此臣區區之私志不能已於言者也是否有當謹恭摺具陳伏

乞聖鑒訓示

遞齊奏稿
後是日奉廷寄按是疏上

請合立河北五省實業學堂疏

光緒三十二年
八月二十日

王步瀛

竊維今日時局外觀雖云商戰其勝負早決於實業蓋商務握富
強之源而實業又爲商務之母苟內力不充外人將蹈隙抵瑕扼

其吭而制之死命我中國地大物博蹈茲危難原因雖多究由工藝之無學顧揆其受害之由尤以黃河流域爲最則籌夫抵制之策當聯瀕河諸省共謀蓋京師爲天下根本而瀕黃河諸行省實近衛乎皇都實業不興民窮必渙受害尤切臣非敢如近日倡分省界之謬說以南北對敵也東南各省爲國家盡納稅義務額數倍於西北其民在生計界亦居優勝良因風氣早開工藝頗能講求出口之貨如糖茶絲紙張等類皆出於手工製造故利宏而民奢北省出口之貨則如棗如栗如豆如皮毛皆天產土貨與外人所謂原料粗品且獎勵其入口者也於彼爲利我之困也固宜況大江以南各省提倡實業湘錫鄂鐵大著成效閩浙粵贛皆有多數學生留學各國路鑛此外若湖南奏設實業學堂湖北創設兵工廠江南製造局附設學堂海州實業附設學堂上海商部實業

學堂類皆痛念危局亟圖補救惟瀕黃河諸省寂然無聞未必識見皆愚實亦財力不逮長此貧弱何以善後爲今之計惟有會同直隸山東山西河南陝西五省速在河北合立一實業學堂期收利權而厚國基其課程先習普通俟二三年後留學卒業生回國再斟酌另辦高等顧茲事體重大規模必須壯闊創始者頗難其人非公忠體國不能破畛域之見非勇敢有爲不能收利益之效臣久蓄此志蘊而未發邇見直隸督臣袁世凱器識宏遠心力果毅其發謀出慮類思爲國家永求治安以之辦理此事必可成效在握且幕府多才足資任使尤爲他省所不及況法政學堂曾經直隸督臣奏准山東山西河南陝西等省舉貢肄業是道成而上者已首爲倡導則藝成而下者更誼不容辭應請旨飭下直隸督臣統籌全局注重京畿罔辭勞怨力任艱鉅速在河北設立五省

實業學堂一所可否即命名曰拱北實業學堂舉凡一切創辦事
宜胥歸主持其有爲臣管見所及者謹臚舉六條以備聖明采擇
一曰擇地學堂創作地貴適宜況關五省實業尤宜以便於交通
試驗距離等均爲主查河南懷慶府地方水品甘美氣候溫和以
言交通則南臨河流直達黃海且爲運河鐵路貫穿縈帶之域其
利便特甚也以言試驗則西連太行互數千里森林礦產異常盛
旺而考察之易可知也以言距離則左齊右秦北連燕晉接壤四
省其爲適中又自昔然也備此三善而無一弊則開工建築應在
此地是爲著手第一緊要位置二曰籌款無米之炊巧婦難爲經
費不足何以集事擬令由直督酌提鐵路餘利凡河南以北之鐵
路以及汴洛陝西已辦未辦之路線將來路工告竣凡有餘利可
提者均酌提出數成並令五省按年撥款協濟不得推諉庶衆擎